

欽
定
全
唐
文

欽定全唐文卷八十二目錄

宣宗四

冊回鶻可汗文

命皇太子即位冊文

即位赦文

大中改元南郊赦文

受尊號赦文

上順宗憲宗諡號赦文

大赦文

欽定全唐文卷八十二

宣宗四

冊回鶻可汗文

皇帝若曰我國家誕膺天命光宅中土君臨九有包舉八荒聲教所加冊命咸及而況回鶻北方之強代濟其烈惠行隣境俗慕華風立國以來嘗効臣節代爲甥舅每歲通和推誠不疑爲我與國當會昌之際自屬天災人罕粒食上下離散牙帳爲墟地多種落所侵國甚黍離之歎朕自登寶祚每軫素懷爰發使臣訪其後嗣輶車旣出蕃使爰

欽定全唐文

卷八十二

宣宗

來咨爾回鶻可汗挺此雄材生於貴族能收旣絕之燼常
存再振之心願嗣天驕載歸地著發使請命誠辭可哀夫
親仁善隣國家之寶興滅繼絕王者之宜況朕布德滂仁
施於海外爾乃堅誠勵節行乎域中所以公侯子孫道在
必復華夏屏衛理宜長存旣將還定舊封式承墜緒克紹
崇構允膺鴻休今遣使臣朝議郎檢校祕書監兼衛尉少
卿御史中丞上柱國賜紫金魚袋王端章副使臣朝議郎
檢校尚書工部郎中兼國子禮記博士御史賜緋魚袋李
潯持節備禮冊命爲九姓回鶻嗚祿登里囉汨沒密施合

俱錄毗伽懷建可汗爾其服我恩榮膺茲位號勉修前好
恢復故疆宜克已於蹕林長歸心於魏闕無怠爾志永孚
於休

命皇太子即位冊文

維大中十三年歲次己卯八月甲申朔十三日景申皇帝
若曰眷彼羣生必有司牧續承丕構允屬元良故命嗣惟
賢立長則順夏禹惟公於聖子漢文終守其成規茲乃萬
國攸同百王不易之道也朕以菲薄獲奉宗祧十有四年
未臻至理惟天示譴降疚於躬藥石無功彌留斯迫歷數

云在天命有歸咨爾皇太子朕之元子幼有聖質孝敬溫
文宏博慎敏稟天地之仁厚含日月之貞明承訓嚮方秉
禮抱義是用命爾陟於元后宜令攝中書令中書侍郎兼
禮部尚書平章事蕭鄴奉冊即皇帝位邦家以寧統緒以
正惟嚴恭祇畏可以事天地惟寬明睿哲可以御臣下惟
慈惠欽和可以撫黎庶惟道罔拂惟賢必親實爾生知豈
竢訓誨著於典冊文事無詞懋昭耿光紹休前駕於戲敬
之於戲戒之

即位赦文

天分四時必始發生之德帝臨九有是先蕩滌之恩故雷
雨作而萬物滋榮慶澤行而兆人悅服皇王之典今古所
遵朕以眇身獲纂丕業上承宗社之眷佑下繫生靈之安
危夙夜祇勤庶臻於理永惟黎元之困賦役之繁干戈未
寧輸發尚急流移未復冤滯猶多刑獄未平姦詐斯起進
獻無度淫巧競生思與蠲除俾從開泰將以導迎和氣咸
致歡心載因大慶之晨式舉惟新之令可大赦天下

大中改元南郊赦文

門下執大象者導陰陽之和帝率土者茂生植之化粵自

軒昊暨於唐虞側身皇階虛己大位懸金鑑之朗耀致玉
燭之融明惠中國以綏四方欽上元而育兆庶所謂至德
勞深企懷朕荷先帝之眷求奉祖宗之成憲獲撫萬國統
和三靈兢嚴丕構惕勵神器實賴昊穹嘉饗神祇降休靈
夷戎狄之聿來鳥獸草木之咸若真宰潛運元功啟光麥
禾豐登兵革偃息物不疵癘人無夭亡發揚氤氲敷祐寡
昧夙夜祇戴訏謀經紀尚懼德教之未宣黎元之未泰貪
虐之害政朋邪之敗風永念困窮思臻富庶每興赤子之
歎不知黃屋之尊爰因首正克舉彝典告受命之纂緒展

嚴配之盛儀柴燎升聞馨香殷薦羣祀昭答百神來享精誠既達感慶良深是用肆眚恤刑改元建號利時者不廢便人者必行俾覃在宥之恩以順發生之氣與之更始咸使維新可大赦天下改會昌七年爲大中元年自大中元年正月十七日昧爽已前大辟罪已下罪無輕重已發覺未發覺已結正未結正繫囚見徒常赦所不原者咸赦除之唯犯十惡五逆已上及故殺人並不在免限官典犯入已贓兼情涉巨蠹及持仗行劫縱不殺人並不在免限左降官量移近處已經量移者更與量移如已至刺史者準

刺史月限例處分諸色官未復資者有司條疏聞奏如復資者五品已上中書門下速與處分六品已下依常調選丁憂去任服闋日亦與量移如有親故在上都任所司陳狀便與處分不必更待本州府申請從九月二十二日降郊禮勅後流貶及引決妄稱冤人等并重推覆囚徒並不在此例別勅因責授降資正員官及曾因痕累停免未經引用者並與進改流人及降死從流者與移近地如有收敘者量才錄用并僧尼道士移隸者亦與放還其情狀難容者更不在量移及放還之限流貶人如已亡歿家口欲

還及須歸葬者聽隨所便如緣葬事幼弱饑窮不能自濟者委所在長吏量給棺槨優恤發遣左降官流人先有官者如已亡歿各還本官亡官失爵痕累禁錮者並從洗滌諸色流貶人元勅內云雖逢恩赦不在量移限者自去年五月五日赦文後已經量移者五千里外更與量移千里三千里外者更與量移五百里情狀難容者不在此限常參官及諸色刺史先停替及以病解免并終制未授官者委中書門下量才進擬勿令稽滯國家與吐蕃舅甥之好彼此無虞自今後邊上不得受納投降人并擒捉生口誓

著山河勲銘鼎鼎恩延後裔義在勸人故尚父汾陽王贈
太師晟太尉秀實司徒顏杲卿贈太師顏真卿許遠張巡
南霽雲子孫中未經甄獎者每家與一人正員官元和以
來河朔節制以土地朝者各與其家一子正員官回鶻殘
寇尚慮窺邊諸道防秋固是常例如或別有徵發久未放
還念其辛勤須議存恤應緣迴鶻別徵集防戍人等宜令
中書門下節級量事賜物仍即具數聞奏歉沴頗甚已議
賑恤冀免流亡自今已後所在時雨稍愆有傷農畝即仰
長吏當時聞奏如涉隱蔽必節級處分古者郎官出爲邑

宰公卿外領郡符所以重親人之官急爲政之本自澆風興扇此道稍消頡頏清途便至顯貴理人之術未嘗經心欲使救百姓之艱危通天下之利病不可得也朕爲政之始思厚時風軒墀近臣蓋備顧問如不周疾苦何以膺朕訪求自今已後諫議大夫給事中中書舍人未曾任刺史縣令及縱曾任有敗累者並不在進擬限守宰親人職當撫字三載考績著在格言貞元元和頻有詔縣令五考方得改移近者因循都不遵守雖諸州縣令或得三考兩府畿內亦罕及二年以此字人望其成化轉書案牘寧免姦

欺道路有迎送之勞鄉里無蘇息之望自今以後刺史縣令除授後一例須滿三十六個月方得替換其責授遷擢即不在此限其受替後量其在任課效作三等聞奏其在第一等委中書門下及吏曹優與處分第二等依資改轉第三等量加降黜其受替後委刺史錄事參軍比驗等第申觀察使與觀察判官勘驗詣實申奏後因事考覈有不
如所奏觀察判官刺史錄事參軍據人節級懲罰觀察使奏聽進止其刺史委觀察使判官具考課聞奏雖去任已久但因事發露合懲合獎並準元勅處分其合拔擢貶黜

者則不拘此限長吏舉薦縣令錄事參軍雖有近勅如涉請託是啟倖門其諸州府縣令錄事參軍吏部所注之官雖與替亦須具所替人罪犯及不勝任事狀聞奏所舉之人須前任曾有殊考不然課績尤異分明有據者方得論請此外中書門下不得與進擬河東振武易定京西北等道官吏料錢過聞寡薄省司注擬罔不固辭承乏之由其新收闕官料錢戶部不用收管便令本府少尹與司錄參軍勾當并舊給課料數額添給見錢在官無少尹即仰觀察判官與錄事參軍同勾當使司輒不敢妄有借貸支用

如違本州官量加貶責長吏別議處分仍委所在鹽鐵度支院判官參訪中書門下如違院官準本州官例處分諸色入仕近者轉多内外官員無不填塞蓋因州府論請多用虛銜軍師論功或未撫實自今已後無正官及無出身者並不在奏州府縣官限縱有出身亦須去避稍近方得奏請諸軍將非有殊功者不在奏兼州縣官限素非吏部注擬之處即不在此限仍委中書門下準此處分京畿之内荆南數州或頻歲辛勤或遭罹歉沴須免租賦以慰疲人京兆府今年夏青苗錢及元和十五年已後至會昌三

年終已前應有諸縣欠日掌閑並宜放免荆南管内應遭旱損農戶赦書下後新年夏隨地稅錢宜並放免塞上置兵本防戎虜苦寒之地尤要撫綏如聞軍中小有所須舊例不無科率或有逋欠必載簿書給衣散糧之時剋折略盡永言此弊積有歲年爰因慶澤須使蠲改自今已後邊上兵士除本分差役外輒不得妄有科配春冬給衣及每月糧米並須當時分付如依前剋折本判官本將並重加貶責長吏別議處分仍從前應有此色欠負不問多少更不得科校徵索所在鹽鐵度支院切加訪察申中書門下

如違院官與判官同議貶責權酷之例諸道權宜如聞所
設科條過有嚴酷一分抵罪連坐數家或沒入資財或身
處極刑里閭之內遂至無聊豈有疲人堪此陷穽宜令中
書門下商量停罷續作條疏聞奏州府拆寺瓦木堆積多
時風雨所侵朽蠹將盡所在出賣雖有勅文百姓畏懼嚴
刑莫敢投狀巡檢防護豈免勞人自今已後百姓要買者
任二年續徵納價錢州縣輒不得暴有校科私茶鹽雖要
止絕法或連坐則害平人自今已後但科犯茶鹽關要人
罪其買茶糴鹽及經過食宿之處並不要勘問差役不時

妨農爲甚古者用人之力歲不過三日蓋爲此也如聞所
在修築動踰數月事非甚切所妨即多自今已後所在州
縣如要修理者任和僱諸色人役使仍須據時價給錢闕
方今就使農戶輒不得追擾遇忙時五月六月九月事非
切時屋宇城壘不在修築限如違官吏並節級貶責仍令
御史臺及所在度支鹽鐵院檢舉申中書門下如涉隱蔽
本御史及本院官並準前處分君以人爲國人以食爲天
有國有家捨此無急如聞州府之內皆有閒田空長蒿萊
無人墾闢與其虛棄曷若濟人宜令所在長吏設法招募

貧人課勵耕種所收苗子以備水旱及當處軍糧其初建
置或鎮小力微不辦營備任量常平義倉粟充糧食種子
及耕農具仍各任本道自詳軍便條疏處分訖申奏每年
所收營田苗子除給耕種人牛量事填補所借常平義倉
本物所冀野無荒田災有儲備觀察使刺史起營田二年
已後據見穀爲殿最衆重貨輕當今最甚吐庶捐瘠莫不
由斯輸納租征須從利便應天下百姓所出土貨幸是官
中每年收市之物即所在州府具色目先下文帖指揮令
據官中收市價輸納不得一一徵納見錢切不得令所由

妄納耗剩如違本判官錄事參軍重加貶責鹽鐵度支院
官不加檢舉亦準此處分諸道藩方牙門將校不獨資以
武略亦在拔其幹能近門下商量停罷續作條疏聞奏近
年隨使人多冗食要職傾奪占位勲舊無依慮不均平例
有停解如聞或有自遠招收或因其投募人材武藝要籍
轅門或因類能擢處右職軍中已著勞績選衆又合甄昇
一例勒停實乖至當其應隨使軍將及驍勇官健等有超
軼輩流者並許待使到後選驗處分設法施禁固在長人
訪姦去邪尤繫胥吏若紀綱不漏上下相同雖損益懸殊

功利百倍度支戶部鹽鐵三司吏人皆主錢穀去留之際切在類能若一槩節以年勞衆職從何條舉必資獎誘明示勸懲其中如有才用智識昭然獨見自期展效建立事功或剔抉疵瑕或糾正案牘發明已往之咎條理將來之規宜委本司便與奏論特有選授仍與勾當依前本司驅使如守職多年無事可稱但循默自容者一例準舊年限勒赴選不得妄訴事故留在本司其案牘中或有過犯並不用追理貴許自新以示宏貸磐石維城本支祚慶親賢之義寵渥宜申文武庶官中外執事皆肅恭職任祇奉郊

裡俾洽推恩同沾霈澤亞獻福王綰終獻撫王紘等各賜物百匹夾侍正衣進珪捧珪各賜物五十匹亞獻正衣各賜物四十匹内外文武見任及致仕官三品以上賜爵一級四品已下加一階合入三品及五品欠考未敘者考足日聽敘魯聖儒風虞賓前典必須展敬允叶國章文宣王之後及二王三恪各與一子官其祠廟委所司量加修飾孝惟資愛禮著事親屬當布澤之辰用覃睦族之慶太皇太后皇太后二等已上親皇三等已上親委中書門下合擇有才行者量與改官無官者與出身皇五等已上親三

品已上賜爵一級五品已上加一階六品已下及前資常選散官簡選日優與處分未有出身陪位者準會昌五年正月三日赦文處分應陪位皇五等已上親及太皇太后皇太后三等已上親三品已上賜爵一級四品已下加一階諸親四等五等并諸色人陪位官五品已上加一階六品已下及白身並賜勲兩轉其前資及有出身各減一選孝弟之道王教所先哀慶之禮人倫所重常參官及諸州府長官父母見存未有官封者並量與五品致仕官及階并邑號如有官者量與進改如官已至五品已上即與五

品階父母亡歿未經追贈者量與追贈官及邑號義深心
膺寄重藩垣俾命追崇延恩存歿用酬勲效豈恡寵私中
書門下及節度使帶平章事宜與一子正員八品官祖父
母先亡歿各與追贈已經追贈者更與改贈節度使各與
一子正員九品官東都留守度支鹽鐵觀察處置都團練
都防禦經略招討使及神策金吾六軍將軍大將軍上將
軍統軍威遠營鎮國軍等使皇城留守各與一子出身父
母先亡歿未經追贈者各與追贈禮儀使京兆尹各與一
子正員九品官昭宣典冊寅奉郊禋宜普恩光以答公幹

應郊廟升壇升殿行事官普恩之外中書門下尚書省御史臺三品已上特加一階四品已下各賜一階如合入三品者量減三考入五品者減兩考仍待考足日聽敘其合選人與減一選內行事官三品已上賜爵一級四品已下加一階內侍省及內坊官四品已上各賜勲五轉五品已下各賜勲三轉應從駕上郊廟者普恩之外三品已上各賜爵一級四品已下各加一階白身賜勲兩轉禁營兵仗列衛爪牙言念勤勞宜頒慶賚神策六軍威遠營左右金吾及皇城將士應緣大禮移仗宿衛御樓立仗等普恩之

外三品已上賜爵一級四品已下各加一階仍準舊例賜物有差其神策將士應在京畿內諸縣者亦各有賜物應緣大禮職掌行事官并修撰儀注及留守副留守守倉庫卿等普恩之外三品已上賜爵一級四品已下各加一階琛賚來朝梯航入貢藩方陳奏職業無虧或禁署策名或官司效用俾同沾渥各示加恩鴻臚禮賓院應在城內蕃客等各有賜物諸道知上都進奏院官在城者各賜勲三轉應緣大禮四方進表疏及賀正官各賜勲三轉翰林待詔供奉并諸色直見任及前資并員外試官三品已上賜

爵一級四品已下各加一階無官者賜勲兩轉掌贊禮儀祇奉郊廟理宜優獎用洽恩華郊廟行事齋郎減二年勞室長掌座禮生贊者減一年勞無勞可減者便放出身崇文館行事學生及齋郎禮生番考已滿所司緣大禮卻遣入行事各減一選國子監學生陪位者賜勲一轉中書門下專知儀制官各特加一階應緣祇奉供作官直司長上諸州行綱考典兩縣耆壽諸色番役當上在城并量留十二月番者各賜勲兩轉飛龍閑廐宮苑典引掌扇內園掌總監裁接少府將作內作中尚武德軍內外弓箭庫等諸

司使下白身及無品直司定額長上雜匠巧兒黃衣長上
監門直長雜仗三衛七色引駕細行執扇角手弩手驍騎
武士天文觀生漏生典鼓典鐘工人樂人主衣主膳主酪
典食胡食手宰手閑幕士御士醫士獸醫門僕藥僮御書
手楷書手流外行署等各賜勲兩轉立敬之本在敦於耆
老勸俗之道莫先於節義天下百姓九十已上各賜絹三
匹八十已上各賜絹兩匹仍委長吏齎帛就家宣賜孝子
順孫義夫節婦旌表門閭終身勿事先已旌表者量加優
恤獄瀆孕靈公侯列位助宣景化利及含生宜委本州府

長吏備禮致祭皇王應期賢哲濟代式遵令德用達明誠
名山大川及自古聖帝明王忠臣烈士各令所在以禮致
祭自會昌元年後赦文及諸色條疏有不便於人者委有
司及外州府長吏條疏聞奏亡命山澤挾藏軍器百日不
首復罪如初赦書有所不該者所司具條疏聞奏敢以赦
前事相告言者以其罪罪之赦書日行五百里布告天下
咸使聞知主者施行

受尊號赦文

門下我國家披皇圖以立極執大象以升中睿父嗣孫重

熙累盛逮予稽古聖孝紹復中興洗滌宿氛廓開昌運天命不易賜予元符荷宗社之耿光致宸瀛之小泰干戈載戢風雨順時北狄來賓西戎効職豈予菲薄汔此肅清皆中外元僚文武多士同心協贊而使之然益用兢慙以戒盈滿而乃累陳丹懇願上鴻名牢讓不從瀝誠彌切於戲昔賢有云舜何人也我何人也苟或讓之不遂予亦敢不思齊今百執事謂予曰聖敬敢忘湯武日躋之詩謂予曰文思敢忘放勳欽明之典謂予曰和武敢忘保大之功謂予曰光孝敢忘繼志之義以是自勗庶無悔焉浮實之名

既不獲已乘春之澤當務惟新可大赦天下自大中二年正月三日昧爽已前大辟罪以下已發覺未發覺已結正未結正繫囚見徒罪無輕重咸赦除之惟正犯十惡五逆以上故殺人及官典犯贓不在此限持仗行劫必欲害人苟遇支敵即行殺戮捍逆追捕肆意奸凶不懲此流無以除惡并故殺人者雖已傷未死已死更生欺冒老小以取財物者意欲殺傷偶得免者並以殺人法處分不在赦原之限闕自今以後稍更廣求如有未曾任刺史縣令居然有誠略才術爲衆所推者亦任於諸色人中選擇爲兩省

官周之宗盟實惟封建漢之子弟亦謂犬牙廣磐石之宗
增維城之固當今源流遠大枝葉蕃昌王室子孫不合布
素宜令本司檢尋譜牒明驗房從貧窮不濟未有身名者
每房放一人出身如有父見在朝門蔭可自補身名者即
不在此限應諸州府縣等納稅只合先差車牛優長戶近
者多是權要及豪富之家悉留諸縣輸納致使單貧之人
卻須僱脚般載從今已後須令有車牛豪富人戶送太倉
及州府輸納其留縣並須先饒貧下不濟戶如有違越節
級官吏重加科殿所在逃戶見在桑田屋宇等多是暫時

東西便被隣人與所由等計會推云代納稅錢悉將砍伐
毀折及欲歸復多已蕩盡因致荒廢遂成閒田從今已後
如有此色勒鄉村老人與所由并隣近等同點檢分明分
析作狀送縣入案任隣人及無田產人且爲佃事與納稅
錢如五年內不來復業者任便租佃人爲主逃戶不在論
理之限其屋宇桑田樹木等佃人逃戶未歸五年內不得
輒有毀除砍伐如有違犯據根口量事情科責并科所由
等不檢校之罪諸道州府應欠開成三年終已前因水旱
不熟貸借百姓及軍用欠闕借便度支戶部鹽鐵錢物斛

斗積欠相承日月既久百姓或無本戶長吏累又改更全
無本色可以支填所司徒有徵索之名終無送納之日虛
繫簿書宜並放免三公僕射不常除官每至上時須有聚
會委以府縣即須擾人宜令度支戶部勾當局席便取京
兆府本色錢充不得令府司差配百姓吏部去年冬選人
如聞多緣文字差錯所司駁放既添員闕亦可矜容若非
身名踰濫及欠選欠考并準格不合收外其餘委吏部與
重磨勘量收待殘闕比遠注擬上已重陽曲江宴會自有
本色五百貫錢費用之間不合欠闕每聞差配百姓不免

擾人從今已後宜令京兆府先與度支鹽鐵計料據所用一物已上除以本色錢物外如有欠少即委度支鹽鐵據數均給府縣不得輒配百姓其所市易並須先給付價錢如有妄配百姓買物不給價錢官吏等並準此同枉法贓例處分仍令御史臺切加察訪天下州府有官吏犯贓皆遞相蒙蔽不肯發明縱有申聞百無一二自今已後管內縣令有犯贓事發州司不舉者連坐錄事參軍有贓犯刺史不舉者坐刺史其刺史有贓事發觀察使不舉者連坐廉使則遞相檢轄功過可明各務清廉悉心爲政度支鹽

鐵戶部三司茶綱欠負多年積弊斯久家業蕩盡無可徵
索虛繫簿籍勞於囚繫者復委本司各條流䟽理聞奏如
先將茶賒賣與人及借貸人錢物若文帖分明的知詣實
即與帖州縣徵理如組織平人妄有指射推勘了後重加
決責釋氏之教清淨爲宗將悟昏迷實資善誘上都除先
置寺外每街更各添置寺五所東都除先置寺外更添置
寺五所每寺各度五十人每處僧寺三所尼寺二所西川
荆南揚州潤州汴州太原河中襄州已上八道除先置寺
外更各添置寺二所每處置僧寺一所尼寺一所諸道節

度觀察使府除先置寺外更各添置寺一所其所置僧寺各度三十人諸道管内州未置寺處宜各置寺二所僧寺一所尼寺一所每寺各度三十人五臺山置寺五所如有見存寺便令修飾充數每寺度五十人數内置尼寺一所已前添置寺宜並先度僧尼漸漸教化建造寺宇不得遽有勞役其僧尼年幾限約并諸條流準會昌六年五月五日敕條事例處分道濟生靈功成克伐晦明雖隔禮敬宜加唐功臣墳墓無子孫者不許砍伐委所在長吏差人巡檢爰念農耕是資牛力絕其屠宰須峻科條天下諸州屠

牛訪聞近日都不遵守自今已後切宜禁斷内外文武任
及致仕官三品已上賜爵一級四品已下加一階仍賜勲
兩轉神策六軍金吾威遠皇城將士普恩之外各賜勲兩
轉道宗魯聖禮洽虞賓式舉舊章以榮後嗣二王三恪及
文宣公各賜物五十匹環衛星陳華夷雲集眷茲勞効俾
示恩華神策六軍金吾威遠皇城等諸軍將統軍以下各
有賜物其將士等長行立仗并守營者各賜物有差鴻臚
禮賓院應在城内蕃客等并節級有賜物澤貴流根宜頒
祿秩義隆追遠用慰孝思常參官及諸州府長吏父母見

存未有官封者并量與五品致仕官及階并邑號父母亡
歿未經追贈者量與追贈官及邑號攝侍中讀寶官攝中
書令讀冊官各賜一子出身撰冊文官賜一子正員官奉
寶綬官書玉冊官書寶官各加兩階進寶綬進冊進中嚴
外辦禮儀贊導押冊押寶綬舉舁寶冊官各加一階其餘
應職掌行事官太常修撰儀注禮官并內行事官三品已
上賜爵一級四品已下加一階仍並賜勲一轉鑄造玉冊
官各賜物五十段中書門下儀制官特加一階禮崇養老
道貴旌賢爰示優恩以宏教化天下百姓年九十已上委

所在長吏量加存問孝子順孫義夫節婦旌表門閭終身
勿事先已旌表者亦量加優恤川岳元功聖賢幽贊宜因
霈澤用薦馨香五岳四瀆宜委本州長吏備禮致祭名山
大川自古聖帝明王忠臣烈士委所在以禮致祭亡命山
澤挾藏軍器百日不首復罪如初赦書有所不該者所司
具作條例聞奏敢以赦前事相言告者以其罪罪之赦書
日行五百里布告天下咸使聞知主者施行

上順宗憲宗諡號赦文

王者之御天下也莫不懋建皇極惟懷永圖先德禮以導

人用政刑以佐理順四時者並施其化育萬物而各遂其
宜然後關土開邊遠柔邇悅衆享美利斯爲大寧我國家
以仁義有乾坤以道德撫夷夏其高祖太宗經綸之列聖
繼體守文之重光累洽延闕景鑠及於憲考文明武英刻
稂莠於甫田振威靈於殊俗肅清澄廓庶績其凝實推中
興歷十五年今予小子大構是承祇奉宗祧敬若天命遐
慕唐堯恭讓之德常勵漢文菲薄之躬懷乎憂勤懼忝負
荷每念河湟之壤陷爲戎虜之疆百有餘年一失莫復元
和中將雪前憤嘗振睿思方除孽臣未就成業永懷道訓

明發疚心近者祖禰降靈中外協一不煩攻伐不費財儲
六郡連收七關盡復削衽解辮樹頌乞降犬羊竄亡億兆
鼓舞厥庸有功繼志克成仰襲丕休聊用無愧臣下欲歸
美譽強我鴻名斯實先聖神功因顧追尊加諡牢讓乃遂
孝思獲申頒告寰區同茲燉慶且慮蒸黎之困猶疑獄犴
之冤是用獻歲之辰乃行在宥之典可大赦天下自大中
四年正月一日昧爽已前大辟罪以下已發覺未發覺已
結正未結正繫囚見徒罪無輕重咸赦除之惟犯十惡官
典犯入已贓不在赦限

大赦文

天將發生萬物也則必假以暄妍潤以風雨王者之在宥四海也期必滌其瑕穢施以渥恩固頻啟於倖門豈無彰於皇澤朕以菲德獲纘丕圖常慕唐堯之無爲漢文之恭儉肝不暇食乙夜觀書萬務靡有不親一夫尤慮失所兢兢業業不敢荒寧十有四年至於茲矣每懼風俗之未厚賦役之尚繁政令之未明刑獄之多濫思用克濟浩無津涯上荷昊穹垂休宗社深祐下賴股肱翊化岳牧懋功五稼屢登四夷內附懷仁庶同於行葦納諫無愧於從繩疵

癘不生飛翔遂性日月所燭庶爲小康顧予寡昧何以臻
此近者藩方之任撫理或乖潭廣宣俶擾相次雖興師殄
寇本於爲人而惡殺好生良多愍納而又緣河數郡暴水
成災念其蕩飄深自憂軫乘此三元之慶宜宏肆眚之恩
可大赦天下自大中十三年正月一日昧爽以前大辟罪
以下罪無輕重咸赦除之唯十惡叛逆故殺人官典犯賊
不在此限

欽定全唐文卷八十三目錄

懿宗一

授蕭鄴荆南節度使制

授杜審權平章事制

授白敏中宏文館大學士等制

勾并年終賦租委御史郎官論奏制

贈何武檢校左散騎常侍制

授夏侯孜平章事制

授溫璋王式節度使制

授蔡京嶺南西道節度使制

授裴休荆南節度使制

授楊收平章事制

授杜審權鎮海軍節度使制

授蔣伸畢誠節度使制

授徐商崔璵節度使制

恤民通商制

以南蠻用兵特恩優恤制

授于琮平章事制

授孔溫裕忠武軍節度使制

貶楊收端州司馬制

楊收長流驩州制

授蜀王佖西川節度使制

平徐州推恩制

授杜審權河中晉絳節度使制

貶康承訓蜀王傅制

立普王儼爲皇太子勾當軍國制

授高璩劍南東川節度使制

欽定全唐文卷八十三

懿宗皇帝

帝諱漼宣宗長子太和七年生會昌六年封鄆王名溫十三年八月立爲皇太子改今名翌日即位咸通三年正月上尊號睿文明聖孝德皇帝十二年正月又上尊號睿文英武明德至仁大聖廣孝皇帝在位十四年年四十一諡曰睿文昭聖恭惠孝皇帝廟號懿宗

授蕭鄴荆南節度使制

入調鼎鼎作我股肱出鎮藩垣爲予心膂分命雖殊於中

外倚才皆屬於安危將相迭居文武兼用允茲遇者厥惟
艱哉況地控南荆土連全蜀扼五嶺之通道當七澤之要
津統馭所難撫理爲重頒斯渥命爰輟重臣銀青光祿大
夫守門下侍郎兼工部尚書同中書門下平章事監修國
史上柱國彭城縣開國男食邑三百戶蕭鄴昴宿垂芒山
庭表異膺明誕德佐理生賢開濟洞達其泉源進退率由
於律度端亮秉志寬和待人而累踐華資克流芳問儼卿
雲之詞藻煥發皇猷邁管樂之智謀掌司邦賦臺閣備詳
其政事朝野咸推其上才由是道觀明成夢叶先帝爰立

作相陟於台階果能經緯巖廊鎮安夷夏罄乃一心凝其
庶績逮予纂承亟獲匡輔疇庸任舊宜乎加恩是用擇其
巨藩委之碩德尚執中樞之柄仍加右揆之崇相閣良規
豈忘蕭曹之業戎垣寵寄更隆羊杜之功勉服殊榮佇宏
懿烈可檢校右僕射同中書門下平章事兼江陵尹充荆
南節度管内觀察處置等使

授杜審權平章事制

天設四序運寒暑而成歲功國有三台仰弼諧以助君道
安危是繫選任攸難況朕涉道未明纂圖方始詳求英彥

思付洪鈞至誠感通果獲良輔翰林學士承旨通議大夫
守尚書兵部侍郎知制誥上柱國賜紫金魚袋杜審權喬
岳埤崇澄波量度稟五行之秀氣挺百仞之貞材虹玉潛
輝龍泉蘊利文窮騷雅學洞元儒毛玠有古人之風邴吉
得大臣之體自便蕃華貫踐歷清途南宮推起草之工西
掖茂掌綸之業洎司文柄俾以掄才全任至公號爲得士
甘棠廉問衆著謳謠秋卿恤刑事無枉撓先皇帝藉其令
譽擢處禁林振藻屬詞發揮神化道一貫於終始器兼適
於圓方逮余建統屢承密旨每多宏益彌見慎修旣彰已

試之能宜懋殊常之寵是用委茲大政列在中樞爲朝廷之表儀實人臣之極地爾尚竭乃心力作吾股肱借箸必罄其嘉謨推局罔遺於善策用無黨之道行惟一之心使爵位功名並光竹帛垂於不朽豈不務乎可守本官同中書門下平章事

授白敏中宏文館大學士等制

門下朕初承天序方崇政源屬在輔臣兼領重職況仙宮至嚴專總尤切儒林之盛分列掖垣良史之能必歸懲勸將欲比肩上古耀美一時克副旁求允膺茂典特進守司

徒兼門下侍郎同中書門下平章事上柱國太原郡開國
公食邑二千戶白敏中氣稟岳靈道洽王佐致君之志發
於深誠銀青光祿大夫守中書侍郎兼刑部尚書同中書
門下平章事充集賢殿大學士上柱國譙縣開國男食邑
三百戶夏侯孜材爲國楨望貫人表濟物之用彰於重任
金紫光祿大夫守中書侍郎兼工部尚書同中書門下平
章事上護軍樂安縣開國男食邑三百戶蔣伸識蘊生知
衆推邦傑徇公之操本乎進思並詞峯峭拔高踰列岫學
海深奧遠含百川邃彼嚴廊付以衡軸動有宏益居然矩

儀叶心而和平造膝而啟沃式諧僉議能弼予違關乃知
功信無與讓是用思闡元化冀揚清靜之規彌在立言更
佇刊削之妙愈疑其討論關必以化成爲先副我虛襟咸
佩嘉命敏中可兼充太清宮使宏文館大學士關餘各如
故主者施行

勾并年終賦租委御史郎官論奏制

舊以天下賦租年終勾并或刺史入府或縣令上州所科
羣胥盡出百姓且官有理所安可擅離物犯贓條何須枉
法從今委知彈御史出使郎官凡繫抵違明具論奏仍委

金史卷之三
預爲條目各遣聞知

贈何武檢校左散騎常侍制

地連山藪境有逋逃武能首率郡兵身歿王事旣嘉忠蓋
宜示褒贈不惟慰彼漏泉將亦激其羣校

授夏侯孜平章事制

門下篙檝克修航艦以之濟海羽翮可厲鷗鵬於是摩天
朕恭已寰瀛勞誠夢獵將以篙檝賢輔羽翮寶臣摩三代
至理之英濟羣生普洽之欲載仗舊德期獲我心劍南西
川節度副大使知節度使事管内度支營田觀察處置統

押近界諸蠻及西山八國雲南安撫等使光祿大夫檢校
尚書右僕射同中書門下平章事兼成都尹上柱國譙郡
開國公食邑三千戶夏侯孜大昂分精維嵩挺秀擅四海
之賢俊作中朝之表儀禮樂詩書資其懿範溫恭孝愛輔
以多才服道以致身含章而底力經國之用貫百川而不
改其清應物之明體萬象而莫窮其照周踐華列多識舊
章郎署諫垣休聲夙振東陽故絳惠愛洽聞洎甘棠政成
會府徵命兼領臺轄之任再居邦憲之尊正色無私當官
必舉總征賦以贍國幹山澤而富人美利無遺嘉猷益覩

積是朝著昇於台司內竭謨明外宏體理馳咎夔之極摯
陋周漢之遐蹤克彰爲輔之聲允叶有開之契屬者以西
南重鎮邊徼多虞爰賴專征以隆外閫福星時雨旣惠巴
庸景化元和須歸鼎鉉是用召於驛騎待以天工重開集
鳳之池再仰問牛之化弼諧萬務師長庶僚亟付機衡俾
康區夏於戲刀非礪不刮魚非水不行爲君誠難得中甚
易決疑定計我以爾爲神龜肥國救人吾以爾爲上藥盡
布四體懋堅一心勉哉勿疑對揚我休命可尚書左僕射
同中書門下平章事散官勲封如故

授溫璋王式節度使制

門下函土名藩懿門奧壤理公劉之故國接煬帝之通津
控地數千帶甲逾萬非威能肅物勇可貞師則何以備天
子之爪牙建上將之旗鼓斷自朕志果叶僉諧武寧軍節
度徐泗宿濠等州觀察處置等使朝議大夫檢校左散騎
常侍兼徐州刺史御史大夫賜紫金魚袋溫璋稟慶德門
騰輝儒苑節峻大玉氣敷早春立言鏘韶濩之音行已植
松筠之操嘗以懿問列於通班佳聲克著於埋輪善價益
彰於題柱累換符竹頗洽謳謠前歲問俗苑溪分麾沛邑

禍息萑蒲之盜風行鈇鉞之權前浙江東道都團練觀察處置等使銀青光祿大夫檢校左散騎常侍兼越州刺史御史大夫上柱國襲魏郡開國公食邑二千戶王式文動星芒學通奧旨早以殊藝射策明廷孫宏之條奏甚精晁錯之鋪陳無闕旣升高第亟踐清途臨事不回當官有守邇者擢自交趾授以漕東果能清越水之波瀾掃稽山之稊氣暫舉十連之化全蘇一境之人而並樂鏡貞明黃陂澹汙風雨不渝於達節機謀自契於生知爰命疇庸是加懋賞乃眷巨屏宜委宏材三禮百工俱榮於題劔鑿門推

轂共貴於登壇疊是恩光我無愛惜爾宜壯轅門之號令
恤閭井之疲羸務農訓兵俾先南牧之備興利除害永絕
東顧之憂更樹奇功以酬劇寵璋可檢校禮部尚書兼邠
州刺史御史大夫充邠寧節度營田觀察處置等使式可
檢校工部尚書徐州刺史御史大夫充武寧軍節度徐泗
宿濠等州觀察處置等使主者施行

授蔡京嶺南西道節度使制

門下天賦全才所以登將壇而衛王室國有令典所以舉
能吏而懲慢官其有術業優長理行彰著則宜錫殊常之

命行不次之恩乃崇德報功之旨也朝散大夫權知太僕卿充荆襄巴南宣慰安撫使上柱國賜紫金魚袋蔡京學富縑緗文含組繡識略甚遠智能出羣本於孤貞濟以勤恪驛騶躩蹠向天路以無疑鵬鶚騰凌入雲程而不返早以豐藝陟於高科周旋宦途振舉官業簪白筆而獲聞峻節擁朱輪而克播清風班資旣崇聞望彌重去歲藩臣失守蠻寇犯邊永令遐長莫窮根本用爾奇事申予至懷目前而情僞皆分言下而安危可決運深謀而禦敵寧遠裔以成勲適及回車召於便殿敷陳之際備得機宜浣吾憂

勤賴爾忠蓋遂以月卿之秩俾酬星使之勞爰藉變通更資宣撫載圖嘉績用洽優恩朕惟濱海而南邕爲重地城臨甌駱俗本剽輕居常則委經略之權有事則付節制之任是用改其舊號建以新軍一時之榮千古無對爾其頒惠養以馭衆示寬嚴以訓兵濟活鄉閭保安谿洞貂冠近侍之首烏府亞相之尊當此寵位宜何如哉於戲特舉徽章直謂殊渥苟或失職吾何望焉勉於奉公勿以爲喜可檢校左散騎常侍兼邕州刺史御史大夫充嶺南西道節度觀察處置等使散官勲封如故

授裴休荆南節度使制

門下王者分職設官所以理天下外建州牧侯伯內置公卿大夫故野無遺賢朝無闕政俾率土絕愁嘆之音接畛有富庶之泰當是選也豈可易乎具官裴休巖廊重德文學宗師才爲代生智尚物表發言所以興家國修己可以服華夷自奮藻儒林射策藝圃迴處顏冉之列疊昇晁董之科濟代之心已彰於事業奉君之志皆推於友朋抗疏七人之官正色三署之內縉紳多士慕高韻以指南貝錦巧詞自退身於有北遂金玉王度丹青憲章三領廉車一

剖符竹皆著去思之稱共興

一作歌

來暮之謠宏圖豈滯於

割鷄令問果還於振鷺委茲文柄任之春闈大呈公鑒之

明備傳德

疑作得

人之美版籍繁務筦權劇權成富國之奇

謀施安邊之大略先皇帝夢想髦彥勵精理道採以公論

付以化權致百度之惟貞覺三台之益重羌戎擾叛調發

時雨之師農畝廢荒申明作霖之旨凡所經濟知無不爲

四鎮入境而獲安三軍推誠而俱感整

疑

盡臣節何愧古

人朕以全楚奧區荆衡重地湊舟車之都會控湖嶺之要

衝藉爾分憂施吾惠澤蘇彼疲瘵勿倦殷繁玉帳兵符旣

榮冠於今日文場武庫當繼蹤於昔賢

一作時

祇服典章無

替徽烈可檢校尚書右僕射兼江陵尹御史大夫充荆南節度觀察處置等使散官勲封如故主者施行

授楊收平章事制

門下古先聖哲之御天下也莫不勞於擇賢逸於恭己是以嚴求匪易殷代稱宗畋獲甚難周王膺命肆朕在位天授正人於言語侍從之間得亮采惠疇之俊固亦高邁前烈垂休當朝敬遵用汝之文爰舉弼予之典雅符不讓斷自無私翰林學士承旨朝議大夫守尚書兵部侍郎知制

誥上柱國賜紫金魚袋楊收器茂渾金寶欽大玉瑩清冰
於溽暑挺綠桂於嚴霜行過曾顏道兼夷惠文冠一時而
若非游藝學該千古而似不能言自鴻飛名場鷺振班列
憲署每聞其守法曲臺咸著於推公所蒞有聲厯試皆可
才彰簡要已洽譽於含香業擅精微遂騰輝於視草戒慎
攸至初終莫渝常懷造膝之忠備見沃心之旨謝安體識
王儉精能動爲僉論所諧居益具瞻之望由是擢於禁苑
升以台階俾申匡輔之勤用闕變和之重爾其慕伊周之
志宏臯益之謨九流旣分百辟斯正嘉猷可舒於前席妙

略尚在於止戈式序三才允歸一德懋乃致主副予知臣
無使載筆之褒獨稱於姚宋也可守本官同中書門下平
章事散官勲賜如故主者施行

授杜審權鎮海軍節度使制

朕垂衣嚮明負宸成化內則委輔弼之重論道於巖廊外
則寄垣翰之崇分憂於撫馭是以入掌鈞軸出擁麾幢必
仗兼才乃膺迭任況軍稱鎮海地亘長江建置旣殊寵劇
斯在駕戎車而佩相印持廟算以統全軍非我誠臣豈行
茂典特進行門下侍郎兼吏部尚書同中書門下平章事

兼修國史上柱國建平縣開國男食邑七百戶杜審權獨
鶴依松孤鸞上漢聳三峯之峭壁澄萬頃之清瀾早以重
名洽於時輩擅讜言於諫署留正範於南宮史筆弛而更
張憲綱紊而復正由是如綸不絕刈楚無遺紹蔽芾於謳
謠盡例成於法理先皇帝知其可用召入內庭果能新耳
目之見聞備肺腑之待遇朕初登寶位素挹嘉猷遽行制
書首列台席故得彝倫攸敘庶政惟和舉去無差於激揚
流品並分於涇渭出入五載初終一途每念鴻勲布在青
簡近者固辭機務動啟懇誠雖懷好德之言難抑好謙之

智是用輟鹽梅於調鼎賜斧鉞於專征金陵大藩正張新
幄式兼啟事載踐中樞不移注意之榮無替沃心之道勉
服休命厥惟懋哉可檢校吏部尚書同中書門下平章事
使持節潤州諸軍事兼潤州刺史充鎮海軍節度使浙江
西道觀察處置等使

授蔣伸畢誠節度使制

門下入則持大政以調化源出則建高牙以主兵柄安危
所屬選任尤難況地壓夷門鎮雄全晉藉機籌以分閫資
紀律以臨戎爰得上才乃申並命河中節度使金紫光祿

大夫檢校兵部尚書平章事河中尹上護軍樂安郡開國
公食邑二千戶蔣伸道惟天縱氣實閒生靈芝茂三秀之
姿威鳳富九苞之彩銀青光祿大夫守兵部尚書平章事
上柱國河東縣開國男食邑三百戶畢誠峻同嶽立注若
川渟祥雲煥五色之章甘雨灑四時之澤而皆備更華貫
周歷清途文飛藻麗之詞位蘊名卿之望或互參禁署咸
稱染翰之工或繼秉國鈞俱播和羹之美以伸輟於台鼎
委以旌旄虞城興禮讓之風蒲阪肅關河之禁馳聲甚遠
奏課居高嘉乃懿圖俾遷巨屏以誠萬機所繫微恙忽嬰

願辭傳說之舟却曳鄭崇之履今則復佩相印載陟齋壇
用光推轂之勞式示彝章之重是咨爾德作於藩垣總梁
國三郡之雄控侯衛中條之險於戲代天理物允屬英奇
撫俗貞師豈勞戒厲服我嘉命往孚於休伸可檢校工部
尚書平章事充宣武軍節度汴宋毫等州觀察處置等使
誠可檢校兵部尚書平章事兼河中尹充河中節度觀察
處置等使散官勲封如故主者施行

授徐商崔璵節度使制

門下建牙訓戎登車問俗分山河之委寄授旄鉞之寵榮

非夫試可之才難膺俞往之命河中晉絳慈隰等州節度
觀察處置等使正議大夫檢校戶部尚書兼河中尹御史
大夫上柱國東莞縣開國子食邑五百戶賜紫金魚袋徐
商植性忠厚接物通和愛日可觀澄波莫測前宣州都團
練觀察處置等使正議大夫檢校禮部尚書兼宣州刺史
御史大夫上柱國博陵縣開國子食邑五百戶賜紫金魚
袋崔璵守道堅固行己端方良玉齊貞霜松比操並以才
業優茂累踐清華或視草於內庭或司言於右掖專一時
之美價擅五字之雄詞旣彰東里之能周厯南宮之秩洎

築壇作鎮按部化人竭爾忠勤副余倚屬進律當升於重
地酬勞宜處於近關乃眷漢濱扼東荆郢顧茲蒲阪俯邇
郊畿錫以麾幢俾之長理於戲惟惠可以安百姓惟威可
以整三軍推誠而人必歸心尚廉而吏將自化謹是四者
以綏一方服我新恩勉宏善政商可檢校戶部尚書兼襄
州刺史御史大夫充山南東道節度管內觀察處置等使
璵可檢校禮部尚書兼河中尹御史大夫充河中晉絳慈
隰等州節度觀察處置等使散官勲封如故主者施行

恤民通商制

安南寇陷之初流人多寄溪洞其安南將吏官健走至海門者人數不少宜令宋式李良瑛察訪人數量事救恤安南管內被蠻賊驅劫處本戶兩稅丁錢等量放二年候收復後別有指揮其安南溪洞首領素推誠節雖蠻寇竊據城壁而酋豪各守土疆如聞溪洞之間悉藉嶺北茶藥宜令諸道一任商人興販不得禁止往來廉州珠池與人共利近聞本道禁斷遂絕通商宜令本州任百姓採取不得止約其徐州銀刀官健其中先有逃竄者累降勅旨不令捕逐其今年四月十八日草賊頭首已抵極法其餘徒黨

各自奔逃所在更勿捕逐

以南蠻用兵特恩優恤制

朕以寡昧獲承高祖太宗之丕構六載於茲矣罔畋遊是
娛罔聲色是縱罔刑戮是濫罔邪佞是惑夙夜悚惕以憂
以勤庶幾乎八表用康兆人以泰而西戎款附北狄懷柔
獨惟南蠻姦宄不率侵陷交趾突犯朗寧爰及舊州亦用
攘寇勞我士卒興吾甲兵騷動黎元役力飛輓每一軫念
閔然疚懷顧惟生人罹此愁苦宜布自天之澤俾垂及物
之仁如聞湖南桂州是嶺路係口諸道兵馬綱運無不經

過頓遞供承動多差配凋傷轉甚宜有特恩潭桂兩道各
賜錢三萬貫文以助軍錢亦以充館驛息利本錢其江陵
江西鄂州三道比於潭桂徭配稍簡宜令本道觀察使詳
其閒劇準此例興置本錢邕州已西黎雋界內昨因蠻寇
互有殺傷宜令本道收拾埋瘞量設祭酹徐州風土雄勁
甲士精強比以制馭乖方頻致騷擾近者再置使額却領
四州勞逸既均人心甚泰但聞比因罷節之日或有被罪
奔逃雖朝廷頻下詔書並令一切不問猶恐尚懷疑懼未
委招攜結聚山林終成詿誤況邊方未靜深藉人才宜令

徐泗團練使選揀召募官健三千人赴邕管防戍待嶺外
事寧之後即與替代歸還仍令每召滿五百人即差軍將
押送其糧料賞給所司準例處分淮南兩浙海運虜隔舟
船訪聞商徒失業頗甚所由縱捨爲弊實深亦有般闕貨
財委於水次無人看守多至散亡嗟怨之聲盈於道路宜
令三道據所般米石數牒報所在鹽鐵巡院令和雇入海
艚船分付所司通計載米數足外輒不更有隔奪妄稱貯
備其小艚短般到江口使司自有船不在更取商人舟船
之限如官吏妄行威福必議痛刑於戲萬方靡安寧忘於

罪已百姓不足敢怠於責躬用伸欽恤之懷式表憂勤之旨

授于琮平章事制

在天垂象常星旣列於三台惟國建官庶政必歸於四輔
朕每思致理益慕無爲苟非正人莫付大柄爰得非熊之
兆乃遵審象之求契予知臣命爾作相銀青光祿大夫尚
書兵部侍郎充諸道鹽鐵轉運使駙馬都尉上柱國于琮
識洞著蔡文窮典謨居然國華蔚爲人瑞自策名筮仕淑
問益高伏蒲彰正直之名起草著經綸之績由是道光獨

立業擅自強勇退無儔謙光有裕朕早聞博雅堪備論思
擢於南宮置之內署果能恪慎相副端貞闕益實多繫賴
闕切洎出貳司寇亟居版圖見君子之盡心表才人之果
決離府任重爰命專之積弊潛聞其日除嘉庸大彰於歲
計咨爾全美爲予誠臣歷試如斯僉諧所至是宜升於輔
翊付以變和惟賢式契於周官懋德雅符於殷誥且有成
計爾其聽焉夫舉直則百度可貞推公則彝倫攸敘進善
則孤寒不棄用才則滯屈自伸克勉斯言是爲良弼敬承
休命往其欽哉可守尚書兵部侍郎中書門下平章事駙

馬都尉

授孔溫裕忠武軍節度使制

門下朕欲考名實以臨人表明賞罰以正萬機爲官擇人
不可廢闕謁郊廟禮之重也設壇場旨之深也稱此劇選
屬於僉諧朝散大夫守尚書戶部侍郎上柱國賜紫金魚
袋孔溫裕才爲國華德擅邦傑心勁而行密神清而氣和
飛文凌邁於曹劉潔已庶幾於顏閔高標跂望迴立正途
鳳彩葳蕤棲止碧梧之月鶴情瀟灑徊翔紫蓋之煙自步
武中朝馳聲內署甘泉侍從宣室對敎相如之工爾實無

愧河洛神明之政關防惠養之風授以版圖陟於蘭省奉
二卿之班列司九典之征徭時論益高官業彌舉宜申茂
典式叶至公朕以長葛故城潁州重地兵甲甚銳賦輿至
殷爰委材能俾膺統馭洎於訓齊師旅潤澤蒸黎導一作追

爾前功何煩教令知臣之道不亦至乎玉節彤弓已極儒
生之貴儀曹憲印用彰賢帥之威勿替令圖往祗休命可
檢校禮部尚書兼許州刺史御史大夫充忠武軍節度陳
許蔡州觀察處置等使散官勲賜如故主者施行

貶楊收端州司馬制

人臣之節莫重於忠良氏族所修無外於清順二者不立
何以正身況乎居常伯之崇應藩侯之寄雖顧初終之體
當明懲勸之端宣歙觀察使檢校工部尚書宣州刺史兼
御史大夫楊收始以文章選在宥密纔厯二歲擢升台衡
謂其發自寒門必有操守行孤貞之道報國用恭儉之理
化時夙夜勵精以酬恩遇而乃貪黷爲業溝壑難盈逞其
私懷盜我名器以官常爲貨利之逕持僭侈爲暴橫之資
田產遍於四海臺榭擬於中禁而又結連奸黨聽任儉人
險詐千端回邪萬狀欺罔彌甚顧慮蔑聞謂日月之照臨

或所隱漏意天地之姦慝可以包容殊不知過既不悛孽無以逭去歲驗其事跡未忍揭揚委以察廉冀塞愆咎時聞縉紳之內物論喧然班列之中怨訟未息朕以寬恕馭下仁閔爲心中外臣寮悉明此志負我既甚其法何如竄於遐陬式示嚴憲爾惟自棄無或尤人可守端州司馬員外置同正員仍馳驛發遣

楊收長流驩州制

勅端州司馬楊收起自孤寒猥承委任罔思報效惟恣姦欺心每挾邪言常近利江西置節制之額務在虛兵浙右

創造船之名便其盜用兩地推覆按驗分明豈可尚佐專
城猶居仕籍俾投荒裔用塞憊尤中外臣寮各體朕意宜
除名配驩州充長流百姓縱逢恩赦不在量移之限仍錮
身所在防押遞送至彼具到日申聞仍路次縣給遞驢一
頭並熟食

授蜀王佖西川節度使制

自古聖帝明王莫不封建子弟錫以茅土寵以珪符俾藩
屏王家翰維天邑朕每讀麟趾識詩人之意念犬牙知漢
祖之心眷乃坤維實推奧壤甲車雄盛貨殖殷繁鈐越舊

則南詔憚嚴鍵松維則西戎畏懼是用授親賢而統制命
良將以經邦維彼遠方稱茲公共蜀王信宇量宏廣風神
粹和承顏於日域之中稟訓於大庭之內弱不好弄居無
愠容語言皆質於詩書造次不離於孝敬蟻封占兩嗣沛
獻之明規象艦知斤繼蒼舒之敏智屬者南蠻入寇西蜀
纏兵瘡痍生縣道之間荆棘繁師徒之役雖英儒鎮禦火
即撲於燎原而權道改張瑟難遵於膠柱由是假爾英略
光予翰垣分玉葉之清陰覆銅梁之重地遙資算畫密受
韜鈴必使萬井歡聲三軍懷德致蕃夷之稽顙革蠻貊之

非心將陟永圖在舉長策對揚休命爾其敬之可開府儀
同三司兼成都尹劔南西道節度副大使知節度事管內
觀察處置統押近界諸蠻及西山八國雲南安撫等使

平徐州推恩制

朕以眇身獲承丕業虔恭惕厲十一載於茲況荷十七聖
之鴻休紹三百年之慶祚將求理本敢忘宵衣雖誠信未
孚而寅畏不怠旣絕意於苑囿固無心於畋遊業業兢兢
日慎一日休徵罔應沴氣潛生南蠻將罷於戰爭徐寇忽
孤於惠養招諭不至虐暴滋深竊弄干戈擅攻州鎮將邀

符印輒恣凶殘不畏神祇自詒覆滅股肱之臣以罪惡之
難捨腹心之衆謂悖逆之可誅爰集甲兵用救塗炭上將
宣力內臣協心選用皆得於良材掃蕩纔及於周歲絕干
紀反常之噍類懲亂臣賊子之姦謀今則已及偃戈重康
黎庶疇庸之典在絲髮以無私懋賞之時貴纖毫之必當
其四面行營立功節度使旣成茂勲宜加酬獎並取別勅
處分應諸道行營都將以下節級軍將各委本道具功勞
名銜分析聞奏當續有處分如有功效高者仍別具歸本
道以後銜節級與遷改職名及向後本軍有職掌員闕先

於行營軍將中選揀任使以獎勤勞被堅執銳冒涉寒暄
解甲櫜弓還鄉復業頒繒帛之賜免差役之征應四面行
營將士今既平寧宜令次第放歸本道其賞賜匹段已從
別勅處分至本道後仍令節度使各加犒宴放歸私第便
令歇泊未用差使如行營人並免差科色役如本廂本將
自今後有節級員闕且先以行營軍健量材遞相差署用
酬征伐之勞迴戈將士賞給匹段各已支給發遣訖各令
中使押領到軍前仍委四面將帥及本都大將於本道軍
營內與中使對面給付不得輒令下吏所由致刻剥一尺

一寸應迴戈將士經歷州縣令供頓遞朝廷並各有處分
宜令長吏切加勾當準備供給不得令有欠闕臨敵用命
力屈殞身須慰殤魂以彰忠節超與職事仍加任使如無
父兄子弟只有妻女者即委州使厚加贈恤常令存撫如
是都將至都虞候陣亡者具名銜聞奏當與贈官應陣歿
將士有父兄子弟願從軍者便令本道填替如無父兄子
弟仍且與給衣糧三年不得停給因戰陣傷損手足永廢
者終身並不停給應陣歿將士及百姓衣冠爲賊殺害者
其骸骨平寧之後如有家口親屬取歸本道收葬仍委所

在州縣量事應接發遣如無親屬來取者即令所在州縣
重與改瘞勿令暴露兼仰與設祭王者以仁恕爲本拯濟
是謀元惡旣已誅鋤脅從理宜寬宥除龐勛親屬及桂州
迴戈逆黨爲賊脅從及縱因戰陣拒敵官軍招諭不悛懼
法逃走皆非本惡蓋鋒刃所驅今並釋放一切不問委四
面將帥州縣鎮戍所在要路分明榜示四散招攜仍許兩
月內所在陳首并令長吏便放歸本管任自營生不得妄
有攪擾其中如有才藝超異者便收錄驅使應徐宿三州
城內收復之後見在軍人百姓除龐勛及桂州逆黨親屬

并爲龐勛腹心謀議凶徒須加刑戮外餘並一切不問應
舊軍將官吏節級所由旣已釋放並令却還本職驅使用
示殊恩地經戰伐人率流亡閭里旣已歸還征賦先宜蠲
免其徐宿濠泗等州應合徵秋夏兩稅及諸色差科色役
一事已上並從十年蠲放三年州縣所由輒不得妄入鄉
村攪擾百姓待三年已後量其事力續議條流處分餘側
近州縣爲賊燒劫者令本道檢勘傷殘甚處分析聞奏待
奏到續議放免編氓失業卹井無人桑柘枌榆鞠爲茂草
應行營處百姓田宅產業爲賊殘毀燒爇者今平寧之後

百姓既已招攜並許識認各本主便自收管州縣及官吏權要並不得妄有侵奪如百姓有家業爲賊虜劫蕩盡交切飢餓者委所在長吏牒逐便供軍使量加給恤如百姓先有倉窖被賊收管者並還本主應行營處鎮砦曾爲打劫占據收復之後須令官吏主將除見在投降將吏官寮及先是本官勾當外餘委所在州縣選擇良吏委之緝理俾令百姓有所歸投舍逆從順臣節旣著頒祿冊勲官常斯切應有效順投降軍將官吏節級立功勞雖有酬淺者及有未沾惠者委四面將帥更子細重分析聞奏待到處

分應募征行已從犒賞還鄉休役務令優容應諸道差赴
行營將士其中本非舊額官健因緣征討召募差行者迴
戈之後如有不願食糧聽從其便亦準前項除兩稅外放
三年雜役九原可作千載不忘尚禁樵蘇寧傷邱壠應有
先賢墳墓碑記爲人所知被賊發掘即却與掩藏仍量致
祭十室之邑尚有所師遁跡闔門獨行高節拒不義之召
非無厭之求熏穴莫尋焚林可取徐宿濠泗等州縣管內
有素忠義不助凶徒樹謀歸國爲賊殘害者具名聞奏當
與贈卹如諸色人內有文學節行因用兵藏避隱跡山林

並令搜訪存撫自用兵以來郡邑皆罹攻劫遠念驚撓尤
在慰安今遣左散騎常侍劉異兵部郎中薛崇等專往宣
撫軍人百姓卹問閭里疾苦回日具利害分析聞奏於戲
朕以四海爲家兆人爲子一物失所每軫納隍之憂一方
未寧常負阨危之戒今元凶就戮逆黨誅夷載戢干戈永
銷氛祲庶平妖氣允洽嘉祥遐邇知聞當體予意

授杜審權河中晉絳節度使制

開府儀同三司檢校司空守尚書左僕射上柱國襄陽郡
開國公食邑二千戶杜審權韻合黃鍾行貞白璧沖粹孕

靈嶽之秀精明涵列宿之光塵外孤標雲間獨步踐歷華
貫餘二十年鑒裁名流凡幾百輩清切之任無不試重難
之務無不經靜而立名嚴以肅物絕分毫徇己之意秉尺
寸度量之懷貞方飾躬溫茂繕性儉不偪下畏以居高語
默適時喜愠莫見頃罷機務鎮於金陵值淮夷猖狂干戈
倖起累發猛士挫彼賊鋒廣備糗糧助茲軍食深惟將相
之大體頗覩文武之全才王導以蕭灑之名不忘戎事謝
安以恬澹之德亦在兵閒及駟馬來朝擢居端揆嚴重自
處恬曠不渝虞芮之故都前蹤尚爾郇瑕之舊地往事依

然兼以股肱之良爲吾腹心之寄改佩相印更握兵符仍
五教之崇名極一時之盛禮可檢校司徒同平章事河中
尹充河中晉絳節度觀察等使

貶康承訓蜀王傅制

河東節度使康承訓將門瑣質戎壘微才曾不知兵謬膺
重祿竊韜鈴以效任畜姦惡以事君幾授鉞於戎藩嘗執
金以邀道謂其盡節委以專征屬者徐部匪寧敢于紀律
俾護諸將坐覆危巢罄國幣以佐軍頒王爵而賞士而玩
寇莫戰按甲不前立法未學於穰苴申令頓虧於孫子況

部伍不戰逼撓無謀人數空多軍威何振使農夫釋耒工
女下機始凝望於天誅翻有思於賊至洎元凶自潰元稹
效忠彭門洞開爾功何有而負恩已甚黷貨是求叨榮苟
幸於一時遺患遂逾於積歲爰行國典俾傳戎藩可蜀王
傅分司東都再貶恩州司馬同正馳驛發遣

立普王儼爲皇太子勾當軍國制

朕守大器之重居兆人之上日慎一日如履如臨旰食勞
懷寢興思理涉道猶淺導化未孚而攝養乖方寒暑嬰癘
實有慮於闕政且無暇於怡神恙未少瘳日加寢劇萬務

繇綜須有主張考之舊章謀於列辟思闡鴻業式建皇儲
第五男普王儼改名儼孝敬溫恭寬和博厚日新令德天
假英姿言皆中規動必由禮俾崇邦本允協人心宜立爲
皇太子權勾當軍國政事咨爾中外卿士洎於腹心之臣
敬保予子輔成予志各竭乃心以安黎庶布告中外知朕
意焉

授高璩劔南東川節度使制

門下南荆舊俗政美劉公西陝芳陰勲傳召伯我用時傑
思齊昔人況梓潼奧區賢彥徊翔之地也稽玉堂之顯效

授黃鉞之殊榮輟諸禁林允叶令典翰林學士承旨朝議
大夫守尚書金部侍郎知制誥上柱國賜紫金魚袋高璩
潘陸重價曾顏上流機神粹和道業堅白呈瑞質而鳳離
丹穴聳孤標而鶚翥青天合珪璧之寒輝咸資逸韻聚雲
霞之秀色併在高文光映古今羽儀中外頃者名場頡頏
早振詞科桐閣從容長專奏記乃升華貫爰近赤墀青瑣
闥中封章不屈紫微天上詔令無雙王寢真侍從之才徐
邈擅文儒之譽親提史筆首列諫垣俄參起部之榮遂陟
夏官之貴鬱有公望稱於朕心雖密贊大猷誠資敏識而

將圖善政亦藉長材眷彼左綿實爲雄鎮旁控巴峽高抗
蜀門前以幢蓋劇權委任巖廊舊德歲久而功懋軍嚴而
吏安改命廷臣俾嗣仁化按節而去自春徂秋旣以疾聞
則宜代用爾之俞往得於僉言勉竭公忠用酬倚注予欲
成爾美志故授以儀曹八座之尊予欲壯爾威聲故帖以
憲闡亞相之秩紅旌啟路紫綬登壇當年得之別是殊寵
勉務勲業副予意焉可檢校禮部尚書兼梓州刺史御史
大夫充劔南東川節度副使知節度事管内觀察處置等
使散官勲如故